



# Sudut Penulis

Bahan asal dari Arkib  
Negara Malaysia

Tiap Khamis dan Sabtu.

## Antara politik, ekonomi, puisi dan sasterawan

Oleh  
**M. HANAFIAH**  
**A. SAMAD.**



● **DATUK SERI DR. MAHATHIR** ketika berucap di malam untuk para sasterawan.

**A**PA yang kita harapkan dari seorang sasterawan? Karyanya? Pengaruhnya? Atau sikapnya? Kata Mochtar Lubis, mungkin dari sedemikian banyak profesi di dunia kita, maka profesi pengarang atau sasterawan adalah yang paling luas wilayahnya. Seluruh kehidupan adalah wilayah pengarang.

Mungkin suatu pendapat yang angkuh mengatakan 'pena penulis itu lebih tajam dari pedang', tetapi itulah kenyataan sebenarnya. Malah 'mendekati pengarang seperti mendekati api'. Ini pun mungkin suatu tanggapan yang keterlaluan. Tetapi, siapakah yang dapat menolak kehadiran pengarang seperti penyair Usman Awang yang kaya dengan protes di dalam puisi-puisinya, novelis Shahnon Ahmad yang banyak membela kaum tani atau dramatis Dinsman yang keras antiestablishmentnya itu?

Dunia politik memang sering menjadi sasaran sasterawan. Politik sering dianggap sebagai tangan besi atau rantal yang mengikat 'kemerdakaan kreatif'. Jeritan Dinsman melalui sajaknya berjudul 'Bebaskan Puisi' mungkin dapat dilihat sebagai manifestasi yang menuntut kemerdekaan itu.

Benarkah kita masih belum mempunyai 'kemerdakaan kreatif'?

Perdana Menteri, Datuk Sri Dr. Mahathir Mohamad, nampaknya tidak pernah putus meletakkan konsep 'liberalisme' — yang mendasari pemerintahan kerajaan sekarang — supaya dapat difahami dan dimengertikan oleh setiap orang termasuk para sasterawan, bebas mengemukakan pemikiran dan pandangan melalui media masing-masing. Penulis yang baik tentulah penulis yang tahu apa yang wajar dilakukan dan dikerjakannya.

Bagaimanapun, Dr. Mahathir dalam keadaan apa pun, tetap menghargai jasa dan sumbangan para sasterawan, kerana sumbangan sasterawan kepada negara bukanlah sesuatu yang dapat dilihat secara fizik. Beliau amat menyedari hakikat ini. "Setiap orang mempunyai tanggungjawabnya sendiri terhadap negara," katanya.

Begitulah hakikat yang terserlah di majlis makan malam untuk para sasterawan yang diberikan sendiri secara peribadi oleh Dr. Mahathir, di Rumah Malaysia pada 1 Disember lalu. Pertemuan tidak rasmi dan lebih bersifat terbuka itu amat berkesan menyentuh hati para sasterawan.

Dinsman dan Grup Teater Elit yang mengusahakan pertemuan tersebut begitu meyakini kesan kemesraan yang terjalin antara Perdana Menteri dengan sasterawan; serasa belum pernah berlaku keakrapan yang begitu rupa. Malam itu memang tiada apa-apa acara rasmi yang diatur. Semuanya berlangsung secara spontan. Ada pembacaan sajak dari penyair-penyair yang namanya dipanggil dengan malu-malu campur terperanjat datang ke depan — maklum saja tanpa persediaan. Ada Kumpulan Harmoni dan Kumpulan Suasana dari Universiti Kebangsaan Malaysia mendendangkan lagu-lagu puisi.

### Protokol

Dr. Mahathir yang mengeneipkan protokol malam itu, berseorangan dengan senyum lembut dan wajah yang berseri mendapatkan para hadirin menghulur salam. Dan salam disambut dengan penuh mesra disulami tawa dan lucu jenaka masing-masing. Di meja makan, beliau tidak duduk di meja khas yang disediakan, Dr. Mahathir benar-benar ingin merasakan kemesraan

bersama para sasterawan.

Tapi, apakah Dr. Mahathir begitu ghairah hendak menikmati puisi? Ketika dijemput oleh Dinsman, Perdana Menteri tampil macam segan-segan. Kata Dinsman: "Buatlah apa-apa yang suka. Nak baca sajak ke, atau nak bercakap ke, buatlah mana-mana yang suka."

Dr. Mahathir mengakui: "Saya tidak pandai membaca puisi. Menulis puisi pun tak pernah. Biarlah orang yang di dalam bidangnya saja membacakannya."

"Orang politik biasanya dikatakan hanya pandai bercakap dan berucap saja," katanya, disambut gelak ketawa. Tapi kemudian ucapannya seperti biasa menekankan soal kerajinan bekerja. Kerana, kata Dr. Mahathir, dengan cara itu saja baru kita dapat menjadi bangsa yang terhormat dan disegani orang lain.

Jamuan makan malam tersebut sebenarnya adalah ekoran dari 'Malam Puisi Panjang Untuk Mahathir' anjuran GTE yang diadakan pada bulan April lalu. Dr. Mahathir ingin menyatakan rasa terima kasihnya kepada sasterawan, seperti yang dijelaskannya: "Malam itu saya tidak berkesempatan menemui setiap orang yang hadir, di mana sambutan yang diberikan kepada saya cukup mengembirakan hati. Sekongon saudara-saudara itu semakin menguatkan semangat saya."